

Entrante dialuna mal stacionamento den centro di ciudad lo tin consecuencia

Cu introduccion di parkeerometers den centro di ciudad ta percura pa regulacion di mal stacionamento. Lo evita autonan para riba acera unda peaton lo mester baha riba caminda pa por pasa, e lo evita un cantidad grandi di incidente y tambe accidente.

Por menciona te hasta e cantidad di autonan cu ta haya raspa of ta perde spiel den avenidanan smal. Entrante dialuna tur auto mal staciona lo mester bay atende cu e consecuencia.

Ta pidi pa tur hende orienta nan mes bon unda e espacio nan pa staciona ta ubica pa evita cualkier mal entendimiento. Entrante dialuna por staciona solamente unda ta marca. E areanan marca cu geel ta pa esunnan cu tin un permiso pa parkeer y e espacio nan marca na blanco ta destina pa e bishitantenan di centro di ciudad.

Tin stacionamento marca na por ehempel Arubus, patras di ex Tivoli, na ex Texas, patras di La Moderna, tin banda

di corte y patras di Botica Oduber. Tur tin nan mashin di Parkeer cu lo bo por deposita e tarifa dependiendo cuanto ora bo ta staciona bo vehiculo. No por staciona vehiculo riba acera of unda cu ta.

Ta compronde cu comunidad ainda lo mester custuma cu e cambio aki y p'esey lo no bay tuma accionnan drastico mesora. Kier regula stacionamento miho den centro di ciudad. Actualmente e intencion ta pa conscientisa tur hende di kico por y no por cu e cambio aki, pero lo yega e momento cu mester aplica e leyman stipula pa esaki. Ta hopi importante cu for di awor caba tur hende ta mas consciente unda por staciona nan vehiculo.

Den e dianan aki lo avisa tur esunnan mal staciona di nan mal habito cu un sticker. Asina bo mira e sticker aki bo lo tin un indicacion cla cu e forma cu bo auto ta staciona no ta esun corecto. Na momento cu cuminsa implementa e ley corectamente e auto mal staciona lo wordo transporta cu un takelwagen, mirando

cu e auto ta mal staciona. Na e sitio nan marca cu parkeerometers, si acaso bo tempo pasa, bo tin 15 minuut pa recarga. Si den 15 minuut bo no a recarga, lo pone un klem na e auto. Esaki tin un multa di 75 florin cun'e. Si despues di 3 ora Aruparking no a ricibi un reaccion di e doño di e vehiculo lo pasa mesora pa takel e auto cu e costo adicional di 150 florin.



P'esey ta importante pa tur hende ta bon informa riba e cambionan, pa sa unda por staciona auto y unda no, pa

evita cualkier inconveniencia. Pa mas informacion por tuma contacto cu Aruparking. □

